

Concept general – pront per la fin da l'onn

Rumantsch grischun en scola

■ (anr/gc) **Suenter l'inscunter dal schef dal departament d'educaziun, cuss. gov. Claudio Lardi, cun ils deputads e las deputadas rumantschas en il cussegl grond – la primavaira passada – eri vegnì communitgà ch'il concept general per introducir il rumantsch grischun en scola vegnia anc suttamess quest atun al cussegl grond.** Quai è stà – sco quai ch'il cusseglier guvernativ numnà ha precisà ier tar la senstupada mensila cun ils represchentants dal meds da massa – ina malenclegientscha. Ins saja dapreschent vidlonder d'elavurar quest concept. Mo previs saja i sulet da preinfurmar surlon-

der l'october la fracziun rumantscha dal cussegl grond ed era orientar questa anc durant la sessiun dal december. Il parlament chantunal sez na vegnia betg a s'occupar da quel tema. L'approvaziun dal concept general cumpetia be a la regenza. Lezza vegnia a far quai anc quest onn. Davart il cuntegn sco tal n'è stà dad intervegnir nagut.

Surpiglià ils plicusts per il parlament federal a Flem

Enconuschentamain è la realisaziun da la sessiun dal parlament federal per l'atun 2006 a Flem tant sco segirada. La regenza è zunt satisfatga da quai. Era ella è s'engaschada – tenor ses presi-

dent cuss. gov. *Klaus Huber* – fitg persuenter. Questa sessiun a Flem saja in segn da simpatia e renconuschientscha vers la Svizra rumantscha – suenter che talas sessiuns ordaifer Berna han gi lieu tant a Genevra (1993) sco a Ligiaun (2001). Il success saja il fretg d'ina buna lavur da team tranter tuts cumpigliads. A Berna saja quai stà il post per ils servetschs parlamentars da la chanzlia federala. En il Grischun haja la chanzlia chantunala procurà la coordinaziun cun la regiun Surselva e la destinaziun da l'Arena Alva: Flem-Laax-Falera.

Il custs supplementars totals per la sessiun ordaifer Berna en il Grischun muntan ad 1,7 milliuns. En la citad federala – ordaifer la chasa federala – avessan els muntà ad 1,3 milliuns. Las expensas supplementaras per la sessiun a Flem èn calculadas cun 650 000 francs. Vid quest importo sa participescha il chantun Grischun cun 250 000 francs (program da rama e segirezza), la regiun Surselva (Corporaziun da vischnauncas Surselva), la destinaziun Flem-Laax-Falera e sponsurs medemamain cun 250 000 francs per l'infrastructura. Il rest da 150 000 francs surpiglia la confederaziun sco pauschala. Cun questa summa è la differenza da custs – tranter salvar ina sessiun dal parlament federal a Berna (ordaifer la chasa federala) ed en il Grischun rumantsch – pli che gulivada.



Claudio Lardi na vegn betg a preschentar quest atun il concept al cussegl grond. Ins saja pir vidlonder d'elavurar quest concept.

FOTO T. DEFILLA